

欽定剿平粵匪方略

欽定勦平粵匪方略卷三百九十六 甲子年

十月二十一日

戊子

僧格林沁官文奏言逆衆敗

潰後分股由廣濟奔逃 臣僧格林沁派常星阿

暫充翼長藍斯明幫辦及溫德勒克西蘇倫保

富森保等馬隊姜玉順蕭河清楊朝林梁洪勝

等步隊分兩路追勦九月二十八日抵車盤鋪

留姜玉順楊朝林殿後二十九日常星阿等追

賊至吳文區郭德園一帶截擊獲勝詎山內突  
出巨股伏匪襲我後路常星阿等分投迎勦而  
前股敗匪又復回撲我軍久戰槍礮俱紅不能  
施放山高路狹馬隊阻於馳驅姜玉順楊朝林  
相距二十餘里馳援不及蕭河清奮勇掠陣手  
刃數賊力竭陣亡常星阿等督隊突出重圍且  
戰且退收隊回營十月初一日該逆以一股牽

掣我軍分股由廣濟翻山繞越蘄州濱湖一帶  
上竄沿途官軍截擊頗有斬擒初四日賊衆竄  
近巴水驛經周鳳山各營出隊迎擊遂由聚茨  
嶺直竄上巴河並分股奔下巴河欲撲黃州協  
防水師各軍均因賊衆兵單祇能力顧沿江鎮  
市要隘不能遠追攔截臣官文急派護衛隊前  
往三台河扼守黃州要道該逆前隊由黃岡直

趨麻城縣境初五六等日在黃泥渡擄船又在  
湯家墩搭造浮橋意圖窺伺武漢均經官軍擊  
散維時廣濟各軍皆落賊後而賊蹤剽疾沿途  
雖經官軍截擊小勝未能力遏兇鋒該逆遂由  
岐亭新洲各路上竄黃陂初七日常星阿等馬  
步各軍趕到迴龍山臣官文催令繞出賊前現  
已趕赴上游節節追剿查武穴龍坪田家鎮下

巴河均爲沿江著名市鎮而漢口尤爲根本重地臣官文先令喜昌帶護衛一營星夜赴漢口駐紮穩守城堡復飛調李成謀馳赴灑口又派周鳳山趕赴灑口會合各營保衛漢鎮並暫留由豫來鄂募勇之知府湯聘珍三營駐防黃陂麻城一帶又調萬化林礮船馳往灑口黃花滂巡防調駐防漢口之振威左營及駐防省城之

武勝一營併赴游湖關駐紮其團風鵝公頸一  
帶合李濟清袁多如分布梭巡至下游各防已  
檄李明惠移紮下巴河之七里鋪兼防蘭谿一  
帶譚仁芳移紮羅田扼要駐守遙爲臣僧格林  
沁大軍西路接應藍斯明四營暫紮上巴河整  
頓軍旅聯絡聲勢其襄河小河口一帶飭張啟  
基督船巡防蘭谿一帶卽令左光培接防下巴

河一帶改飭丁長春廠船分段扼紮仍恐該逆  
由黃孝窺伺德安檄調駐防樊城之沈俊德一  
軍馳赴德安會同趙克彰分隘駐紮一面飛咨  
河南撫臣豫派勁旅迎擊以免竄越劉連捷一  
軍疊經檄催坐守皖境並未入楚查此次賊匪  
巢穴已失形同流寇非合數省兵力會剿無以  
制其死命現臣僧格林沁已入皖境距楚漸遠



臣官文擬移營前赴附近黃陂地界以便督剿  
至常星阿等此次由廣濟追賊既不能整齊隊  
伍謀定而戰出圍之後又不能繞前攔截致該  
逆西犯擾及腹地姜玉順楊朝林遲於救援均  
屬咎無可辭相應請

旨將副都統常星阿蘇倫保溫德勒克西富森保總  
兵楊朝林均革職留任撤去勇號候補提督藍

斯明姜玉順候補總兵梁洪勝均暫行革職撤  
去勇號以上各員仍請留營督隊以觀後效儘  
再不知奮勉卽行嚴叅治罪候補提督蕭河清  
戰功屢著此次追賊遇伏陣亡深堪憫惻相應  
請

旨飭部照提督陣亡例從優議卹入祀湖南湖北昭  
忠祠並於原籍長沙縣及死事之廣濟縣地方

建立專祠以彰功烈而慰忠魂其餘陣亡員弁  
勇丁容俟查明辦理奏入

上命議政王軍機大臣傳諭僧格林沁官文曰賊由  
廣濟上竄官文現派常星阿等趕赴上游追剿並  
令喜昌等分防漢口等處著檄飭派山各軍實力  
嚴防扼要駐紮相機勦辦務期一鼓殲除僧格林  
沁追剿獲勝受撫者十餘萬衆該逆心存叵測首

鼠兩端係屬意中之事僧格林沁暫駐黑石渡鎮  
撫並著官文妥籌辦理陳得才勢極窮蹙現在英  
霍潛太一帶著僧格林沁官文嚴檄各軍前截後  
追兩面夾擊務將該逆迅速擒獲並著知照豫省  
官軍合力兜剿迅殄逆氛

上諭內閣日記名提督蕭河清戰功卓著此次由廣  
濟追賊猝中賊伏力竭陣亡深堪憫惻著照提督

陣亡例從優議卹入祀湖南湖北昭忠祠並於原籍湖南長沙縣及死事之湖北廣濟縣地方建立專祠以慰忠魂其餘陣亡員弁勇丁著僧格林沁等查明照例辦理所有追勦不力及赴援遲誤之副都統常星阿蘇倫保溫德勒克西富森保總兵楊朝林均著革職留任撤銷勇號候補提督藍斯明姜玉順候補總兵梁洪勝均著暫行革職撤銷

勇號以上各員仍責令留營帶隊勦賊以觀後效  
儘不知愧奮卽著嚴叅治罪

二十三日 庚寅 左宗棠奏冒自武平失後永定南

靖龍巖俱陷漳郡亦被占踞業經臣調撥勁旅  
水陸馳援至臬司張運蘭勦匪向稱得力此次  
馳援武平孤軍挫陷身受重傷查無實在下落  
所有福建按察使印信現存汀州郡城該處軍

情緊急閩省無知兵大員堪以接署惟查候補  
按察使王德榜久歷戎行謀勇兼備先經臣調  
赴江西勦賊現在吉安贛州一帶堪令速帶所  
部由瑞金入汀會合各軍攻勦並接署福建按  
察使篆務以資得力張運蘭下落另行確查具  
奏奏入

上命議政王軍機大臣傳諭左宗棠徐宗幹曰張運

蘭馳援武平縣城孤軍控陷身受重傷至今尙無  
下落所有福建按察使印信現存汀郡刻下該處  
軍情緊急自應遴選知兵大員前往接署著照左  
宗棠所請福建按察使卽著王德榜署理並飭令  
速帶所部由江西瑞金入汀會合各軍實力攻剿  
毋少遲誤其張運蘭實在下落並著左宗棠徐宗  
幹查明具奏



左宗棠又奏言遵查前署浙江鹽運使金衢嚴道繆梓在浙服官多年素稱廉幹咸豐八年閒保守衢郡尤著勞績十年二月閒杭城被圍兩次派勇縋城擊賊並無堅不出戰之事迨城陷時登城拒戰身受多傷遇害最爲慘烈前撫臣王有齡於甫經蒞任之始輕聽浮言奏請將該故員撤銷卹典實屬一時疏誤合無仰懇

天恩給還卹典以慰忠魂而彰公道奏入  
上從之

同日張之萬毛昶熙奏言鄂賊經官軍擊敗後  
分竄英山賊騎駛至六霍之間偏近商固十月  
初九日商城所屬蘇仙集一帶已見賊蹤又准  
官文來咨曹家河股匪回竄廣濟蘄水上犯竹  
瓦店等處欲由麻城黃安竄赴豫境等語豫南

卷之四十五

邊防同時喫重臣等當卽檄飭參將王文行崔廷桂各率兵勇馳赴光羅適中之地扼要駐紮確探賊蹤何路有警卽往何路迎勦總兵張曜一軍扼紮金家寨尙嫌單薄現飛催總兵趙鴻舉率領蔣東才彭心友各營由松子關拔隊馳赴蘇仙集會合張曜之軍相機夾擊並飛飭沿邊各屬調集團勇扼守邊隘以壯聲勢而固藩

籬仍一面將新募各勇簡練成軍者由臣等相  
度機宜隨時親督策應以期周密

張之萬毛昶熙又奏言據總兵張曜稟報賊由  
麻埠竄至楊家灘十月初八日我軍由金家寨  
出隊迎勦賊知官兵緊躡西竄熊家河一帶張  
曜截其後股殲斃數十名賊復由蘇仙集直趨  
曾家岡初十日遊擊李大成率隊探勦斬首數

十級賊之後隊蠶擁而來該遊擊依山力戰適  
張曜前隊親軍與僧格林沁派令追賊之營總  
春壽馬隊馳至蘇仙集會合進追賊向鄧家集  
奔竄春壽率馬隊跟蹤尾擊該匪且戰且走我  
軍追至商城之北晝夜行百六十里而賊蹤剽  
疾異常勢將北犯張曜兼程繞至光山一帶由  
北面橫截又據光山縣稟報十一日賊由光山

竄往西南官兵沿途躡擊未敢停留臣等查此  
股竄匪遇兵卽走其勢似窮然鋌險之餘須防  
反噬現已飛飭張曜會合春壽繞出北面相機  
截剿毋稍大意王文行崔廷桂等軍已抵羅山  
卽飭與張曜等合力剿擊並飛飭各屬調集民  
團扼要嚴防以固疆圉奏入

上命議政王軍機大臣傳諭僧格林沁張之萬毛昶

熙曰賊由英山擾及商城邊境復由蘄水上犯偏  
近豫南漸有深入之虞而黃麻又與信陽羅山處  
處接壤亟宜嚴密扼勦方免竄入腹地張之萬等  
已飭王文行等馳赴光羅適中之地探賊迎勦趙  
鴻舉等馳赴商城邊境之蘇仙集會合張曜之軍  
夾擊卽著嚴飭各軍遇賊卽擊毋令深入擾及完  
善蘇仙集之匪經張曜前隊親軍與僧格林沁所

派之春壽馬隊合兵進偏賊向商城以北奔竄張  
隴繞至光山一帶由北面橫截該匪由光山竄往  
西南亟宜乘其窮蹙一鼓殲擒著僧格林沁嚴飭  
春壽會合豫軍分路窮追勿令該逆得以喘息勦  
辦自易得手張之萬毛昶熙亦卽督催各軍盡力  
追擊並分飭沿途地方民團扼要堵截不可稍涉  
大意



二十四日 辛卯 徐宗幹奏言探聞臬司張運蘭接

仗受傷後經團勇救護在武平城外數十里地方惟至今未接該司稟函迄無確耗前已飛飭接統湘軍之道員張恆祥會同署汀州鎮總兵關鎮國所部迅往援應並確探馳覆延建邵道康國器已分軍赴汀合力堵剿其龍巖州踞賊據報愈聚愈多該州所屬之漳平甯洋與永春

大田永安等縣路路可通慮其乘虛內竄先經  
檄飭參將丁翼管帶兵勇馳赴大田交界之二  
十九都坂駐紮防堵復遴委升用知府趙均護  
理汀漳龍道督帶壯勇前赴甯洋並飛咨署陸  
路提督林文察迅撥隊伍前赴甯洋一路擇要  
駐紮漳州城賊未退官軍未到以前賴紳團志  
切同仇齊心殺賊臣先給諭褒勸許以事平請

獎一面飛催林文察統領全部由漳郡界連之  
同安縣一路迅速進兵並飭遊擊蘇吉良管帶  
兵勇由附近漳城東路石碼地方與鄉團合力  
圍攻復查署水師提臣曾玉明於十月初二日  
內渡已抵廈門當卽飛咨統領水師亦由石碼  
繼進會合陸路兵勇相機兜剿其泉廈各處防  
守事宜由興泉永道鄧廷楫署泉州府知府李

慶霖督率地方文武選募得力兵勇會同紳團扼要嚴防不至下竄惟據報南靖縣於九月十三日被匪竄入平和縣相繼失陷此時兵力實難分布日盼浙師及援江各軍早抵閩疆以資堵剿其南靖平和兩縣文武下落另行確查辦理奏入

上命議政王軍機大臣傳諭曾國藩英桂左宗棠毛

鴻賓沈葆楨徐宗幹郭嵩燾曰前據左宗棠奏稱  
閩省軍情緊急業經派令黃少春劉明珍赴邵武  
劉典赴汀州高連陞赴福州現在汀漳賊勢披猖  
著左宗棠分檄派出各員迅帶所部剋期入閩該  
督抵衢後仍著體察情形入閩督勦迅掃逆氛前  
因鮑超請假諭令左宗棠等卽飭宋國永婁雲慶  
分帶鮑超所部赴閩勦賊著曾國藩再行檄催該

員等迅速前進歸左宗棠調遣毋失機宜江省兵  
勇可以抽撥入閩者沈葆楨此時當已酌量派往  
卽著迅催起程毋稍延緩左宗棠前派援閩之兵  
已有一萬八千而由江援閩者尙有宋國永數起  
兵力已厚徐宗幹當飭閩省兵勇併力協勦務將  
此股賊匪聚而殲旃省城防守事宜隨時與英桂  
妥籌布置毋稍大意漳郡紳民義勇可用徐宗幹

須乘機鼓勵以輔兵力曾玉明內渡已抵廈門卽  
著催令統領水師會同現派之陸軍相機兜剿毋  
得專待援軍致賊延蔓南靖平和失守情形及文  
武員弁下落著與張運蘭下落一併查明具奏賊  
匪雖趨重閩疆而粵省邊隘多與閩省毗連隨處  
皆可回竄毛鴻賓等尤當力籌防剿不可稍有疏  
虞劉連捷一軍昨據官文奏坐守皖境並未入楚

此時鄂皖賊勢已蹙亟須一鼓殲除著曾國藩迅  
催劉連捷等軍剋日拔隊前進會合楚師前後夾  
擊或僧格林沁或官文調遣均須飭令遵調不得  
專候曾國藩到楚始行前進致誤事機

二十五日壬辰官文奏言逆匪於十月初六等日

由新洲倉子埠一帶竄過黃陂勢將突撲漢口  
臣飛調周鳳山一軍於初八日趕到聶口扼紮



與水師萬化林唐瑞廷等會合堵截該逆折回  
黃陂竄入孝感之楊店分股擾至九子墩雙廟  
等處經周鳳山督軍截擊悉竄楊家河白沙鋪  
一帶臣於十一日馳抵黃陂嚴督常星阿等盡  
力追剿十三日常星阿等敗賊於白沙鋪擒斬  
甚多將賊館盡數踏毀賊向三家店趙寺埠斗  
岡嶺一帶分竄前隊已至德安適臣所調藍斯

明一軍亦趕赴白沙鋪助剿又派李成謀梁洪  
勝兩軍由應城天門繞出賊前迎擊飛咨湖北  
提臣江長貴嚴防襄樊隨稟並調水師總兵張  
啟基都司熊星源守備黎澤庚分防襄河副將  
唐瑞廷巡防府河總兵萬化林仍防澗口嚴扼  
水路以顧腹地擬就楚省兵力分道兜裏爲聚  
殲之計惟路徑分歧僞竄越河南卽當檄飭楚

軍出境與豫軍會擊並嚴飭溫德勒克西等馬  
步各軍若賊西竄卽跟蹤追擊至武漢之防臣  
會同撫臣吳昌壽嚴密布置其下竄股逆探知  
已由六安北走僧格林沁躡蹤力追惟楚省下  
游各邑雖已肅清而六安以上固始商城均與  
羅田麻城黃安接壤已飭譚仁芳四營會同團  
勇扼守羅田成大吉一軍經僧格林沁檄令回

楚現飭扼紫岐亭適中之地上固武漢以保下  
游門戶又調周鳳山一軍移紮麻城之兩路口  
以壯上游聲勢其沿江各水師仍飭加意巡防  
再僧格林沁現追賊出境楚軍均已回鄂是以  
不及會銜具奏

官文又奏言據候補提督成大吉呈稱前於七  
月十一日在麻城縣木牌樓地方陣斃黃衣賊

會其時據獲賊供稱係偽扶王陳得才因令逃  
出離民識認僉稱面貌不符未敢具報茲於十  
月初二日在安徽太湖縣境擒獲偽增王護衛  
陳二條據供增逆藍呈春七月十一日殪於木  
牌樓所稱面貌與前黃衣賊會相符據實補報  
等情查藍呈春係著名賊會既經陣斃實足彰  
顯戮而快人心奏入

上命議政王軍機大臣傳諭僧格林沁官文曰敗賊  
分竄前隊已至德安官文現今李成謀梁洪勝兩  
軍由應城天門繞出賊前迎擊江長貴嚴防襄樊  
隨棗張啟基等嚴扼襄河等處水路著卽嚴飭派  
出各軍分路緊躡合力勦洗爲一鼓聚殲之計官  
文所稱若賊西竄卽令溫德勒克西等督軍西追  
勢將縱賊入秦又成不了之局官文惟當督飭該

員等將黃孝德安等處之賊實力勦辦就近殄除  
毋得以鄰爲壑致令窮蹙之賊復肆猖獗僧格林  
沁現在追賊赴皖據官文奏稱楚軍均已回鄂何  
以並不會同該親王之軍協同掃蕩其應如何撥  
兵前赴皖豫交界越境追勦以固邊圉之處著官  
文妥籌辦理前據僧格林沁官文奏稱誘擒僞端  
王藍城春凌遲處死茲據官文奏成大吉在麻城

木牌樓地方將藍呈春已瘞於陣所奏情節前後不符藍呈春是否卽藍城春究竟在何處職斃著僧格林沁官文確切查明具奏

二十七日

甲午

喬松年奏冒扶逆陳得才一股經

蔣凝學之軍自楚追及疊獲勝仗殺賊甚衆收降三萬餘人其時僧格林沁亦由霍山派兵進擊該逆勢蹙計窮服毒身死蔣凝學將屍身搜



獲送僧格林沁大營查驗戮屍梟示連日收降  
共十萬餘人除僧格林沁挑留者不計外英翰  
現留三千五百餘人郭寶昌現留四千餘人張  
得勝何紹彩現留二千人餘均遣散並飭各軍  
及地方官妥爲彈壓不致再有後患臣思巨憝  
雖除防兵未便遽撤所有英翰一軍令駐霍山  
何紹彩一軍令駐英山張得勝一軍仍駐流波

確朱洪章等軍仍駐宿松會國藩續派之易開  
俊一軍令駐潛山聯絡聲勢以資彈壓俟民情  
敕定再議撤調儘有零星逃匪亦可就地殲除  
伏查此股髮逆跳梁已及十年此次以全力犯  
皖十萬之衆一旦撲滅皖北一律肅清除英翰  
郭寶昌戰功已由僧格林沁具陳外道員蔣凝  
學身先士卒勦滅巨逆實屬謀勇兼全可否

賞還布政使銜以示獎勵提督張得勝何紹彩扼守  
六安之衝力堵竄賊奮勇截殺收降匪衆數萬  
實屬異常出力應如何給獎伏候

聖裁至帶隊員弁出力兵勇可否容臣擇尤酌保出  
自

鴻慈奏入

上命議政王軍機大臣傳諭僧格林沁張之萬喬松

年曰扶逆就殄皖北一律肅清洵足寒賊膽而快人心所獲是否陳得才正身著僧格林沁查明具奏前據官文奏稱賊之前隊已至德安令李成謀繞前截擊皖省現無賊蹤著喬松年督飭蔣凝學等軍馳赴楚境會合夾擊以收聚殲之效豫省距楚較近前據張之萬奏賊由英山擾及商城邊界復由蘄水偏近豫南該撫已派王文行張曜等軍

迎勦當經諭令張之萬督軍追勦扼要堵截並著  
喬松年選派皖防將弁帶兵前赴豫疆與豫省各  
軍併力兜擊務期盡殲醜類

上諭內閣曰扶逆陳得才一股竄入皖境道員蔣凝  
學等督兵進擊殺賊甚重收降三萬餘人僧格林  
沁亦由霍山派兵進擊陳得才窮蹙服毒身死戮  
屍梟示道員蔣凝學身先士卒殄滅巨逆奮勇可

嘉著賞還布政使原銜遇缺題奏提督張得勝遇  
缺簡放提督何紹彩力堵竄賊奮勇截殺收降匪  
衆數萬亦屬異常出力張得勝著交部從優議敘  
何紹彩著遇有提督缺出儘先題奏其餘出力員  
弁兵勇著喬松年擇尤保奏候旨施恩

二十九日

丙申

曾國藩奏言

臣欽奉

諭旨馳赴皖鄂交界督兵勦賊現值李鴻章前來江

甯辦理監臨事務臣與面商須淮軍與湘軍三路並進方能得力因會檄調劉銘傳李鶴章等統率淮勇渡江而北隨臣西上進勦皖鄂之賊惟臣自咸豐四年躬親矢石屢次敗挫厥後十載久未親臨前敵蓋自揣臨陣指揮非其所長不得不自藏其短俾諸將得展其才此次臣若自赴楚界未必有益而與僧格林沁官文同駐

蘄黃四百里之內以

欽差三人萃於一隅恐啟賊匪輕視將帥之心擬仍  
駐紮安慶六安等處派劉連捷等直入黃州各  
屬聽候官文調遣凡臣所能調者官文皆能調  
之儻有不遵調度惟臣是問力戒將士畛域之  
見以敦江楚一家之誼務將此股賊匪悉數掃  
除使皖鄂一律肅清庶仰慰



宸厪於萬一奏入

上命議政王軍機大臣傳諭曾國藩李鴻章曰前因  
楚皖賊勢甚衆僧格林沁官文均未得手諭令曾  
國藩赴楚皖交界督師勦賊現皖省肅清楚境餘  
賊由黃孝竄德安一帶逆數無多楚軍可敷勦辦  
曾國藩又派劉連捷等軍入楚歸官文調遣計日  
定可廓清著卽飭令劉連捷李鶴章劉銘傳等軍

迅赴黃州德安等處遇賊卽擊如賊趨皖豫並令  
各軍分投防剿通力合作爲一勞永逸之計曾國  
藩卽可無庸前赴安慶亦無須交卸督篆仍駐紮  
金陵妥籌調度李鴻章現在入關監臨俟出關後  
仍回江蘇巡撫本任並咨行吳棠富明阿各回本  
任江蘇各郡縣新復規制釐定一切理財用人撫  
綏安輯事宜曾國藩當次第經畫用副厚望

曾國藩又奏言前任浙江撫臣曾國荃自同治元年統帶湘軍進攻江甯駐軍城下以來從征將士屢次攻奪要隘捍禦劇寇先後陣亡傷亡近九千人積勞病故萬五六千人皆係歿於王事雖屢邀

朝廷優卹之文而崇祀報功闕焉未備今大功屢定就城中遺屋略加修改凡陣亡傷病文武弁

勇分別正祀附祀依次列入庶足妥侑殺魄激  
勸方來合無仰懇

天恩准照各府昭忠祠之例飭地方官春秋致祭於  
聖朝褒忠勵節之道或亦有補於萬一奏入得  
旨允行

同日左宗棠奏冒遵查前署浙江布政使鹽運  
使銜杭嘉湖道麟趾當咸豐十一年九月閒粵

匪圍攻杭城隨同前撫臣王有齡登陴守禦晝  
夜巡防十一月二十八日賊犯武林門該署司  
督帶親軍開礮轟擊城陷力竭殉難其母瓜爾  
佳薩克達氏投水自盡子女二人同時被害洵  
屬大節懍然應請

旨將該署司照布政使例議卹伊母及其子女並懇  
恩飭部旌卹以闡幽光奏入

上諭內閣曰署浙江布政使杭嘉湖道麟趾於咸豐十一年九月間隨同前撫臣王有齡守城禦賊晝夜巡防至十一月間城將陷時該員督帶親軍開礮轟擊旋因賊已入城力竭捐軀該員之母瓜爾佳薩克達氏投水自盡暨該員之子女二人同時殉難洵屬大節無虧深堪嘉憫前署浙江布政使鹽運使銜杭嘉湖道麟趾著照布政使例從優議

卹加恩予諡入祀浙江省城昭忠祠並著該旗查明伊子在京尙有幾人於百日服滿後帶領引見伊母瓜爾佳薩克達氏及其子女著一併交部旌卹以彰忠節

同日張之萬毛昶熙奏言賊匪竄擾豫南沿邊西走意在入山踞險爲負隅之計經張曜等節節追擊敗賊於羅山宣化鎮擒斬甚多餘匪竄

向西南亟應乘此聲威迅圖掃蕩惟信羅邊境  
多山難保該匪不乘虛而入臣等前派參將崔  
廷桂先已進抵羅山復恐賊窺兵單派參將王  
文行馳赴信陽會合截剿適知府湯聘珍赴楚  
募勇業已成軍亦卽檄令進紮信陽西南楚豫  
交界之小林店聯絡崔廷桂等軍力扼西北竄  
路其正陽陡溝亦係北竄之路並飭遊擊連美



帶隊進紮以張聲勢張曜追軍現已過宣化鎮  
春壽率馬隊由信陽追入楚境臣等復飛飭王  
文行崔廷桂各率所部由信羅進軍會合張曜  
兩面緊逼務殲窮寇一面飛檄各屬調集團勇  
搜捕餘匪勿令伏匿以仰副

聖主綏疆蕩寇之至意奏入

上諭曰宣化鎮之仗雖有斬擒賊匪尙未大受懲創

現在竄往西南之匪固應嚴防回竄豫疆仍應嚴  
飭張曜王文行等軍會合楚軍夾勦聚而殲旃勿  
留餘孽

欽定勦平粵匪方略卷三百九十七 甲子年

十一月初二日

己亥

科爾沁博多勒噶台親王僧

格林沁杭州將軍國瑞奏查各股髮逆經我軍在皖境追勦勢窮無不紛紛投誠惟邱元才一股屢以乞降爲詞並不倒戈來降臣恐該逆詭詐冀緩我軍追擊當飭營總烏爾圖那遜春壽總兵張曜等跟蹤尾追十月初十日至高城

以東秣稽市地方經烏爾圖那遜等揮軍攻勦  
擒斬多名該逆向西南竄去十四日追至羅山  
縣屬之仙花店地方遇賊接仗斃賊多名該逆  
經我軍擊敗十八日向隨州境高城一帶遁竄  
當飭張曜督帶所部倍道緊追勿稍鬆勁又據  
道員蔣凝學稟報據降衆供稱僞扶王陳德才  
因大軍前截後追不能逃竄遂服毒身死經該

道派兵帶同降目高啟城搜獲逆屍令各降目  
驗視結稱屬實委員解送來營臣因該逆倡亂  
多年僭稱王號荼毒生靈莫此爲甚將該逆戮  
屍梟首並藍城春首級一同解至督臣官文行  
營酌量在於湖北曾經蹂躪地方懸示連日督  
飭藩司英翰等將投降人衆選擇留營效力贖  
罪令參將施紹恆遊擊周隆延各帶降衆一千

名歸已革提督馬德昭統帶令降日馬融和倪  
澧淮高大貴等選帶降衆三千五百名歸總兵  
郭寶昌統帶其餘降衆俱交英翰分起遣散遞  
解回籍辦理業已就緒遂飭英翰督帶所部駐  
紮霍山提督何紹彩道員蔣凝學駐紮英山參  
將丁得勝暫帶總兵張得勝隊伍駐紮流波磴  
並咨會撫臣喬松年飭令提督朱洪章等軍在

於楚皖交界之張家塆等處聯絡紮營隨時搜捕零匪兼防賊蹤回竄奏入

上命議政王軍機大臣傳諭僧格林沁官文國瑞張之萬曰投降人衆經僧格林沁督飭英翰等分別留營遣散業已就緒辦理甚妥仍著飭令帶兵各員及沿途地方官妥爲彈壓毋任別滋事端其邱元才一股現竄隨州之高城一帶勢漸西趨僧格

林沁已飭張曜督軍緊躡並著官文迅飭西路防  
軍迎頭截擊力扼竄路楚豫邊界爲賊匪往來熟  
徑官文張之萬務當督率在事員弁探明賊蹤併  
力夾擊以收聚殲之效曾國藩昨已有旨令其毋  
庸赴楚其所派劉連捷李鶴章劉銘傳等軍已令  
其馳赴黃州德安等處勦賊著官文酌量情形分  
別調遣以資得力



僧格林沁國瑞又奏言查侍衛富山經臣等委  
令管帶吉林馬隊二百五十名頭品頂戴

記名副都統黑龍江副管善慶係由撫臣張之萬委

令管帶吉林黑龍江馬隊一千名因官兵技藝

生疏遂委副都統色爾固善會同善慶認真教

演復與色爾固善分管各帶馬隊五百名會令

該員等在各處防剿賊匪現與大軍會合臣等

查該員等所部官兵技藝生疏隊伍不整且馬匹亦多疲瘦倒斃官兵每因無馬率皆落後總由該員等平素廢弛營務不能認真訓練而富山較之善慶尤爲性耽安逸除將善慶所部隨隊官兵一百十餘名飭交協領雙全管帶其富山所帶隨隊官兵八十餘名委員接管外應請旨將富山卽行革職善慶革去頭品頂戴撤銷副都

統仍留副管用示薄懲第富山善慶年力均屬  
強壯且善慶向來打仗尙稱勇往擬請仍留軍  
營以觀後效儻再不知愧奮卽行從嚴叅辦奏

八

上諭內閣曰侍衛富山頭品頂戴記名副都統黑龍  
江副管善慶經僧格林沁等派令管帶吉林等處  
馬隊防勦賊匪乃不能認真訓練以致官兵技藝

生疏隊伍不整馬匹亦多疲瘦倒斃而富山性耽  
安逸尤爲懶惰實屬咎有應得富山著卽行革職  
善慶著革去頭品頂戴記名副都統仍留副管用  
示薄懲均著仍留軍營以觀後效

同日官文奏言前接成大吉稟報在安徽太湖  
縣王家坳訊據獲賊供稱僞增王藍城春經該  
提督於七月十一日在麻城縣之木牌樓地方

殺斃業經臣奏明在案茲准僧格林沁咨稱逆首藍城春等率黨赴翼長成保等營乞降是成大吉前在木牌樓殺斃之黃衣賊酋並非藍城春臣未能確查率據稟入奏亦屬疏忽應請

旨將成大吉交部議處將臣交部察議奏入得旨均著加恩寬免

官文又奏言據成大吉呈稱夏秋之間白杲蔡

家河兩次被圍已革副將擬發新疆之貴廷芳  
偪賊而壘堅守苦戰及賊敗竄又復晝夜追剿  
始終奮勉呈請免罪前來臣詢之前敵各營僉  
稱該革員奮勇殺賊委無捏飾仰懇

天恩俯准將已革副將貴廷芳免其發遣仍留成大  
吉軍營帶隊打仗以資得力奏入

上從之

同日曾國藩李鴻章奏言江蘇各屬蹂躪過久  
元氣太傷必須加意休養軍務雖定而海疆重  
地防兵未敢遽撤臣李鴻章復蒙

恩飭署兩江轄境過寬則兵力尤不可少頃調劉銘  
傳李鶴章等洋槍隊萬餘人隨臣國藩進剿皖  
鄂仍須籌養勁旅以備調撥援應臣國藩所部  
分駐金陵及皖南北者尙有五萬餘人仍須臣

鴻章隨時設法籌濟惟查揚防一軍現在裏下  
河安靜無事楚省逆氛遠距數千里前敵重兵  
節節堵扼實無他虞揚州與金陵僅隔一江總  
督旣駐省垣臣鴻章可就近接防臣國藩由皖  
北兜剿亦無竄越後路之虞富明阿所部兵勇  
擬請

特旨飭令分起妥爲遣撤庶騰出江北之餉以一半



分解甘省要需以一半分濟皖軍前敵似於大局有神奏入

上命議政王軍機大臣傳諭會國藩富明阿李鴻章曰現在楚皖一帶賊勢寢衰諒不能肆意北竄貽害鄰疆揚防一軍自可妥爲遣撤以節經費該處現存兵勇共若干名著富明阿查明將現有馬隊裁汰疲弱揀選精銳派員管帶馳赴甘省都興阿

軍營助勦所有一切勇隊卽著分起妥爲遣撤務  
須查照屢次裁勇章程嚴加鈐束並分咨該勇原  
籍各地方官量爲安插俾安生業前因湖北軍務  
稍鬆已諭令曾國藩毋庸前赴皖省李鴻章吳棠  
富明阿卽毋庸遞署各缺均可各回本任富明阿  
於遣撤兵勇後著卽馳赴江甯接印任事將整頓  
旗營撫綏勞來各事宜次第舉行以重職守江北

之餉計可騰出若干著曾國藩李鴻章查明實在  
數目以一半分解甘省以濟要需以一半分濟皖  
軍前敵並著妥議章程迅速具奏裏下河一帶現  
在無事該處地方本係該督撫等所轄自應妥籌  
兼顧以免疏失

曾國藩李鴻章又奏言遵查江甯自咸豐三年  
省垣暨各屬縣先後被陷偽都竊踞閱十二年

羣賊南北往來擄脅焚戮之苦百倍他處附近  
數百里內幾無安土今幸克復金陵普天同慶  
而該處被害至慘且久田疇荒廢人民稀少非  
休養生息數年別無權宜補救之方臣等遵

旨詳查茲復晤商再四擬懇

恩綸特沛准將江甯府屬上元江甯六合江浦句容  
溧水高淳七縣錢漕自同治四年起一律豁免

三年至同治七年再行啟徵以蘇民因而廣

皇仁奏入

上諭內閣曰前因江甯克復應徵錢漕亟宜分別蠲  
緩降旨交會國藩李鴻章查明具奏茲據奏稱該  
處自咸豐三年郡縣先後被陷士庶慘遭焚掠克  
復後田疇荒蕪人民稀少農商驟難復業懇請將  
應徵錢漕豁免三年披覽情形殊堪矜憫自宜特

沛恩施以蘇民因所有江甯府屬上元江甯六合  
江浦句容溧水高淳七縣錢漕自同治四年起一  
律豁免三年至同治七年再行啟徵

同日毛鴻賓郭嵩燾奏言據署嘉應州知州程  
培霖等稟稱平遠縣知縣吳炳綬自中槍墜馬  
後經其胞弟吳燧挺身救起該員見賊已入城  
憤不欲生經紳民等環跪慰勉該令乃復大集

鄉團號召義旅裹創力戰生擒僞天福楊偉錫等賊衆氣奪遂於初四日由差干一路竄去立將平遠縣城收復先是賊已分撲鎮平縣之米坑初三日更分三路直撲鎮平縣城該縣知縣龐掌運平日居官清正素洽民心當聞警時合縣士紳會議乘賊勢未定急擊走之於是與署鎮平營都司任士魁主事劉伯英等分投迎擊

賊隊已亂乃後股屬至愈聚愈衆任士魁手刃  
數人力竭陣亡遂由東門一擁而進廳掌運方  
在南門督戰回顧賊已闌入遂號召紳士捐貲  
雇募壯勇各鄉團亦齊心協助立將該匪擊敗  
賊由松口一帶竄去查前股賊匪經粵中擊敗  
後聞已竄陷漳州府城而江西雩都瑞金踞賊  
及湖州後股殘匪亦經鮑超擊敗相繼跟蹤入



閩漳汀兩屬與廣東之潮嘉各郡犬牙相錯在  
在毗連而大埔饒平尤爲當衝且濠逆汪海洋  
一股竄踞汀州府之武平距平遠之下壩僅三  
十里該逆時遣游騎四出擄掠侵入粵境均經  
知府吳贊誠副將方耀截勦獲勝是廣東北路  
之防雖覺稍鬆而東路情形萬分喫緊臣等慮  
福建兵力未厚一經賊擾其勢必不能支設該

逆將兩省連界之處融成一片勦辦愈形棘手  
乃檄方耀帶勇四千名飭由嘉應越福建境地  
會同閩軍跟蹤兜勦復飭湖州鎮總兵翟國彥  
馳赴閩粵交界之區嚴密堵截兼爲方耀後路  
策應檄催都司鄭紹忠由南雄拔赴嘉應會合  
諸軍相機兜擊一面飭道員唐啟蔭督勇二千  
陽江鎮總兵任星元督楚勇一千接防南雄不

得以賊勢略遠稍形鬆懈仍飭臬司李福泰督  
勇六千駐紮龍川居中策應以固東江諸路之  
防又多張告示諭令脅從之徒棄逆反正如有  
悔罪歸誠者臣等當欽遵

諭旨斟酌辦理至平遠縣知縣吳炳綬鎮平縣知縣  
龐掌運於失守後均於三日內收復城池尙知  
愧奮且查該員等素得民心故能招集鄉團立

圖規復較僅止隨同官軍收復者實有不同可  
否仰懇

天恩免其治罪仍革職留營差遣以觀後效出自  
鴻施署鎮平營都司守備任士魁血戰捐軀應請  
飭部照都司陣亡例從優議卹

毛鴻賓郭嵩燾又奏言據提督鮑超咨開現在  
江西一律肅清因舊創復發難以支持已請假

一年回籍等因前來查江西踞賊雖經鮑超曼  
次大創而逆首李侍賢汪海洋等尙稽顯戮且  
據鮑超曼開湖州廣德敗賊現已投入偽濠王  
汪逆股中其詭謀密計更不可不防是江西暫  
雖肅清而後患猶巨鮑超一軍在楚軍中最爲  
驍勇若責令跟蹤窮追會同閩粵各軍合力兜  
剿區區殘寇萬無不立就殄滅之理且該軍乘

履勝之威鼓行而前賊衆懾於先聲聞風膽落  
更有事半功倍之效相應願請

恩旨責成鮑超忍將此股餘孽一律掃蕩無論在江  
在閩在粵必殲滅無遺而後已庶可竟此一篲  
之功勿貽將來之患奏入

上命議政王軍機大臣傳諭毛鴻賓郭嵩燾曰粵中  
敗賊竄入福建漳州府屬漳逆汪海洋復竄踞汀

屬之武平游騎四出侵入粵境既經吳贊誠方耀  
等截剿獲勝而東路情形仍屬喫緊毛鴻賓等現  
檄方耀帶勇四千名由嘉應繞赴閩境會軍兜擊  
並令翟國彥等分防要隘李福泰督兵策應所籌  
尙合機宜卽著督飭派出各軍實力防剿毋稍疏  
虞鮑超已經賞假回籍葬親其所部之軍前已有  
旨令宋國永婁雲慶分統其衆入閩援剿歸左宗

棠發縱指示必能會合閩軍痛掃賊氛毛鴻賓等  
惟當嚴飭方耀迅速赴閩合力夾擊將此股餘匪  
悉數殲除毋留後患

上諭內閣曰江西賊匪竄撲廣東平遠縣城知縣吳  
炳綬督團出擊中槍墜馬賊遂蠶擁入城吳炳綬  
旋復集團力戰生擒賊目該逆遂於九月初四日  
竄去當將平遠縣城收復另股賊匪於初三日竄



撲鎮平經知縣龐掌運都司任士魁等分投迎擊  
該逆後股突至任士魁力竭陣亡賊遂由東門關  
入龐掌運卽號召鄉團將賊擊走收復鎮平縣城  
平遠縣知縣吳炳綬鎮平縣知縣龐掌運於賊撲  
縣城未能固守致被攻陷均有應得之咎惟據毛  
鴻賓等奏稱該員等於三日內集團收復尙知愧  
奮且據稱該員等素得民心吳炳綬龐掌運均著

免其治罪仍革職留營差遣以觀後效署鎮平營都司守備任士魁血戰捐軀殊堪憫側著照都司陣亡例從優議卹

初六日

癸卯

左宗棠奏冒據報閩省漳州仍爲賊

踞李侍賢踞漳州汪海洋踞濯田丁三洋踞武平賊數頗衆雲霄旣失漳平告急閩中人心益形震動臣自應迅速馳往相機勦辦所調援閩

各軍約分三路劉典率八千餘人由江西撫建  
入汀州爲西路計時已入閩邊臬司王德榜所  
部二千五百人亦由此路繼進黃少春劉明珍  
率所部馬步四千六百人由衢州江山出浦城  
爲中路十四日已抵浦城高連陞率所部四千  
並知府魏光邴所部五百人由杭州赴甯波雇  
坐輪船直趨福州出興泉爲東路日內可抵福

身之真圖之四卷三十一  
州臣將浙江巡撫關防兩浙鹽政印信交藩司  
蔣益澧護理定於二十八日帶親兵及各營取  
道衢州浦城以出中路閩浙總糧臺仍駐衢州  
其浦城建甯均設轉運局一切進止機宜容當  
隨時馳奏

左宗棠又奏言浙省援閩各軍統計二萬餘人  
每月約需餉銀十四萬兩此時漳州龍巖及汀

州各屬均被賊擾閩省軍需萬分支絀浙省派  
去援師所需餉項自應由浙協濟臣赴閩後應

旨責成護撫臣蔣益澧署藩司楊昌濬每月籌撥餉

銀十四萬兩解交衢州總糧臺轉解軍前以資

應用

同日徐宗幹奏言現探竄犯漳龍各處係李侍

賢一股賊黨多而且悍時出焚搶均被兵勇民團截擊退踞城內近將城垣築高意圖久踞以待後援僞將丁逆現踞武平一帶濂逆在汀郡之濯田等處其衆各有數萬而敗勇士匪裏脅難民居其大半臣節次飛催水陸各軍會合民團相機進剿據報遊擊陳詔舞擊賊於響水橋陣斬長髮老賊多名生擒四名進偪古縣社又

殺賊數百名遊擊許忠標自韶安募勇援漳遇賊於木棉菴奮力衝擊斃匪多名署漳州府通判馬珍等擊賊於東關縣丞潘丙源擊賊於赤嶺員外郎陳必榮等率團助剿均斃賊多名其自南靖平和來援之賊均被兵勇擊退縣丞陳誥夜入賊營殺賊三四千人北斗社黃姓鄉民與賊鏖戰埋釘桶於社外賊誤墜死者八十餘

人其分竄汀郡河田三洲策田之賊經關鎮國  
派令參將黃國安等分路夾擊陣斬逆匪多名  
生擒二名各處雖有斬獲而兵力究形單薄未  
能大挫兇鋒林文察已於十月初九日由同安  
灌口直趨漳郡與曾玉明水師會合並號召鄉  
團分路圍攻至汀州一路前請提督鮑超就近  
援應現尙駐紮瑞金縣界康國器先已移師至



連城援應張運蘭舊部湘勇收集尙有千餘人  
後隊留粵三旗兵勇近亦到汀均交張恆祥接  
統卽催令與關鎮國康國器等相機堵剿旋准  
督臣來咨已飭提督黃少春率所部一營三旗  
及馬隊五百名並副將劉明珍所部三營由浦  
城前往邵武一帶查邵屬近無匪蹤當卽飛咨  
黃少春等徑達延平取道尤溪大田直抵漳平

同趙均一軍會合攻拔龍巖並防內犯泉廈各路續接督臣咨稱添派提督高連陞等帶兵三千餘名由甯波航海來閩又派劉典一軍由汀入援臣已派委文武員弁分路迎催俟高連陞登岸到省面商機宜再行進發均奏入

上命議政王軍機大臣傳諭左宗棠徐宗幹蔣益澧曰福建官軍分路剿賊疊獲勝仗惟李侍賢汪海

洋丁三洋等逆尙踞漳州灌田武平等處賊數頗衆左宗棠現飭劉典王德榜由西路進黃少春劉明珍由中路進高連陞等航海直趨福州出興泉爲東路之師而自率親兵由衢州浦城赴閩相機調度於地勢軍情籌畫均中窾要卽著督率各軍迅速入閩實力剿賊盡殄賊氛其閩省之曾玉明康國器等軍及江西赴援之宋國永婁雲慶等軍

仍著左宗棠徐宗幹分別檄催會合夾擊期收聚  
殲之效至援閩軍餉業由左宗棠飭令蔣益澧楊  
昌濬等每月籌解銀十四萬兩源源接濟卽著蔣  
益澧督飭楊昌濬妥爲籌畫按月如數撥解以利  
軍行

左宗棠又奏冒 臣 欽奉

恩命以江西搃獲逆種仰荷

鴻施錫封伯爵濫叨

懋賞慚懼滋深伏念殄除盜賊慎固封守皆疆臣職  
分當爲之事况論平浙一役溫處則得閩師之  
力嘉湖則賴蘇軍之力卽幼逆就擒亦江西諸  
將士吏民之力爲多臣本藉助鄰封稍寬咎責  
豈宜濫縻好爵更荷

褒封伏懇

皇清通志卷之三十一  
三十一  
皇上鴻慈允收成命俾臣得稍安愚分勉效馳驅無  
虞隕越不勝悚息待

命之至奏入

上諭內閣曰前因左宗棠督師恢復浙東郡縣規復  
浙西並攻克杭州省城肅清全浙派兵援剿皖南  
江西掃除餘孽特沛殊恩將左宗棠錫封一等伯  
爵以示優異茲據左宗棠奏懇陳下悃懇請收回

成命並推功於諸將士所奏意存退讓具見悃誠  
惟朝廷功懋懋賞原以該總督抵浙後削平巨寇  
屢克名城肅清浙江全境厥功甚偉豈能無破格  
恩施以獎勞動至溫處嘉湖用兵雖得閩師蘇軍  
之助總由該督調度有方剋期底定洪幅瑱竄擾  
江西亦由該督派兵援剿方能迅速蕝事左宗棠  
實爲有功國家之臣錫爵酬庸洵可當之無愧所

請懇辭伯爵之處著毋庸議

左宗棠又奏冒 臣 欽奉

諭旨飭查已革臬司李元度被叅情節 臣 維曾國藩  
原叅以失守徽郡徑自募勇赴浙飾報克復義  
甯等城由江西援浙節節逗留以致杭城失陷  
四者爲重如原叅徽郡失守一節 臣 查李元度  
自湖南平江募勇三千於咸豐十年八月十六



日甫抵徽州而李侍賢已先四日攻陷甯國府  
城旋破叢山關李元度固守徽州府城三日力  
竭被陷其時曾國藩尙未知李元度下落奏叅  
革職掣問實爲允當惟其情尙有可原者以三  
千之衆分駐叢山關徽州城當十數萬狼狽之  
寇勢本懸絕以不能固守責之可也若如言者  
謂其棄城逃避並稱其逃走在徽城未失之先

奏劾失實洵不足折服其心如原叅不候審訊  
徑自募勇赴浙一節查李元度之募勇赴浙實  
由前撫臣王有齡奏調曾奉

諭旨允行既非李元度營謀亦非鄧輔綸援引李元度  
每以曾國藩原叅失實極口呼屈臣詢之鄧輔  
綸亦云實無其事觀杭城未陷之先瑞昌王有  
齡屢次檄催李元度迅速馳援並飭浙紳胡光

塘爲其籌措行糧可知此議實出於王有齡非  
李元度之徑自募勇赴浙明矣如原叅由江西  
赴浙節節逗留以致杭城失陷一節查李元度  
入浙時金華嚴州兩城已陷浙東徧地賊蹤龍  
游本是堅城李元度頓兵其下兩月不能速拔  
本圖舍龍游不攻急赴杭州之援無如前途堅  
城要隘均爲賊踞進兵之路早已斷絕觀後此

臣軍入浙先克遂安守之斷賊北路包抄乃引  
軍解衢州江山之圍進攻龍游湯溪蘭谿克復  
金華肅清浙東然後攻富陽餘杭以攻杭州驍  
將勁兵葺事尙在兩年以後然則李元度當時  
孤軍未能深入情固可原若以杭城失陷謂由  
李元度逗留所致未足折服其心至原叅李元  
度飾報克復義甯等城一節查李逆由皖南江

西徑竄湖北意在收羅黨夥以張逆餒追裏脅  
既衆復假道江西皖南以歸金陵李元度由平  
江通城尾賊而來於賊去之後居復城之功實  
近無恥臣嘗以此詰李元度祇據稱曾見賊旗  
則其未嘗開仗可知乃當時竟騰書報捷致湖  
北江西均據以入奏此罪之可議者一也自臣  
軍解衢州之圍復轉江山斷賊入江西福建之

路時李元度固守江山分八營隨臣出隊尙爲  
出力臣倍加獎借以期共濟時艱並因欠餉無  
從籌措應暫留數營緩撤俾餉項得資周轉乃  
李元度自聞曾國藩劾奏落職後卽悻悻求去  
維時臣軍除留守遂安外隨同出戰者僅五千  
人而李侍賢全股及粵賊譚星等花旗粵匪人  
數實二十餘萬衆寡懸絕臣許其汰撤數營挑

留數營隨同勦賊李元度固執不從必求全撤  
且先將臣所指留各營撤去以示絕無轉念明  
知其時浙境淪胥無從得餉臣軍營苦窘萬分  
乃日向倡索不給不休當浙事危險之時心懷  
怫鬱不顧大局如此此罪之可議者二也伏乞  
皇上飭部按律定擬以昭允當奏入

上諭內閣曰前因御史劉慶奏叅已革臬司李元度

罪重罰輕請仍按律定擬當經諭令曾國藩左宗棠查明具奏嗣據曾國藩奏稱前因徽州失守將李元度奏參革職拏問本屬從嚴該革員前在江西力戰撫州支持危局本有兼人之才懇請酌量錄用復經諭令左宗棠查奏茲據左宗棠奏稱李元度固守徽州三日賊衆兵單力竭城陷原參謂其棄城逃避在徽城未失之先殊爲失實其募勇



赴浙實係王有齡奏調並非不候審訊擅自回籍  
該革員援浙時浙東徧地賊蹤進兵之路中斷孤  
軍未能深入杭州失陷非由李元度逗留所致惟  
飾報克復江西義甯等城一節於賊去之後居復  
城之功未經開仗竟報捷書嗣在江山隨營勦賊  
輒因會國藩叅劾落職悻悻求去必欲將各營全  
撤徧索軍餉不顧大局等語李元度從前本有職

功被叅各節亦多不實情有可原惟在江西飾報  
勝仗不顧大局撤勇索餉咎有應得著該部分別  
情罪秉公按律定擬以昭平允

徐宗幹又奏言據興泉永道鄧廷枏稟稱逆匪  
由大埔襲入閩境先結土匪阻遏驛路以致文  
報不通現有漳郡逃出難民僉稱署漳州鎮總  
兵祿魁汀漳龍道徐曉峯禦賊陣亡漳州府知

府扎克丹布罵賊被害龍溪縣知縣錢世敘遊擊沙肇修皆同時巷戰身歿等語又據汀州府知府朱以鑑等稟報連日偵探臬司張運蘭於九月初九日帶兵駐武平初十日聞賊至距城三十里之下壩隨卽督隊馳往十一日遇賊於中赤地方三戰三捷斃賊無算追至數十里中途遇伏深入重圍竟無出路復有大股逆匪從

旁包抄所部久戰勞乏張運蘭仍衝冒直前傷  
亡甚衆張運蘭中矛落馬經親勇力負突圍猶  
呼殺賊迨後悍賊麴聚衆皆衝散不知何往至  
今尙未檢獲忠骸似此情形必無生還之理查  
張運蘭自訓練鄉團從軍多年周歷八省臨陣  
身先士卒謀勇超羣此次血戰捐軀實堪痛惜  
布政使銜福建按察使張運蘭顯懇

天恩飭部從優議卹署漳州鎮總兵副將祿魁汀漳  
龍道徐曉峯漳州府知府扎克丹布龍溪縣知  
縣錢世敘署漳州中營遊擊沙肇修亦均以身  
殉均請

飭部從優議卹以慰忠魂奏入

上諭內閣曰本年九月閒髮逆餘黨由廣東竄入閩  
境按察使張運蘭督兵迎勦三戰三捷後因追賊

遇伏深入重圍中矛落馬該逆遂勾結土匪竄陷  
漳州府城力戰陣亡之文武各員均堪憫惻署漳  
州鎮總兵副將祿魁汀漳龍道徐曉峯漳州府知  
府扎克丹布龍溪縣知縣錢世敘署漳州中營遊  
擊沙肇修均著交部從優議卹以慰忠魂其張運  
蘭陣亡情形仍著交左宗棠徐宗幹詳細查明據  
實覆奏再降諭旨

初七日甲辰沈葆楨奏言欽奉

諭旨沈葆楨著加恩賞給一等輕車都尉世職並賞給頭品頂戴等因伏念臣抵任時江西闔境肅清以臣籌備無方致遭蹂躪疊請嚴加議處從重治罪皆蒙

恩貸下私慚戴刻弗去懷今大慙就捨

天施下逮凡茲

異數皆統兵大臣親歷行閒十餘年身經數百餘戰  
所不敢希冀者臣何人斯乃得與蘇皖浙之全  
省淪胥疆臣闢草披荆克復舊物者一體論功  
自顧鶩庸何以堪此當賊氛四逼臣未出省門  
一步並以韜略不如諸將一切調度未敢遙制  
悉令前敵統兵大員相機辦理血戰累月僅足  
相持又經曾國藩左宗棠不分畛域分以不貲



之餉濟以決勝之師轉危爲安庶有今日而主  
客諸將奔馳於炎風烈日之中晝夜不得休息  
弁勇傷亡殆半裹創血戰扶疾以行且餉輒逾  
期師無宿飽其被擾各郡縣百姓焚殺之酷流  
亡之慘目不忍觀耳不忍聞稍爲完善之區又  
皆竭其脂膏以充兵餉然而主客各軍及閩省  
紳商士庶猶能仰體

國家德意奮勉圖功輸將恐後者或諒臣限於才  
力所不及尙無因以爲利之心故也今死傷未  
收流亡滿野欠餉動逾百萬賑恤莫展一籌臣  
貪天之功因人之力先膺

上賞縱軍民退無後言臣已滋愧況悍賊尙踞鄰封  
時時有回竄之虞萬一軍民稍有違心所關大  
局殊非淺鮮雖

朝廷賞罰自有權衡非顛蒙所能窺測然

天無私覆凡臣子心所未安之故均許委曲自陳仰

懇

鴻慈逾格俯念臣爲大局起見

恩准收回

成命俾軍民得以共諒臣心臣不勝惶恐待

命之至奏入

上諭內閣曰前因官軍勦賊疊次獲勝生擒逆洪  
幅瑱朝廷以沈葆楨自抵江西後籌防籌勦深合  
機宜浙皖賊匪屢次竄江均經次第掃蕩當降旨  
賞給一等輕車都尉世職並賞給頭品頂戴茲據  
沈葆楨奏瀝陳悚愧下忱推功諸將並以曾國藩  
左宗棠不分畛域協餉濟師始得轉危爲安懇請  
收回成命具見該撫退謙之忱惟朝廷論功行賞

一乘至公沈葆楨於賊匪竄江以來督率兵勇殲  
除各巨首生擒幼逆先後肅清疆圉戡亂之功深  
堪嘉尙至該省兵力不敷調遣雖由曾國藩左宗  
棠撥軍援助究由該撫開誠布公聯絡一氣始能  
將士用命迅奏膚公且江西省吏治民風日有起  
色皆由該撫實力實心克盡厥職所致允宜殊恩  
特沛以獎勵勤該撫所請收回成命之處著毋庸

議

沈葆楨又奏冒逆首洪幅瑱及洪芒玕洪芒政黃汝英等犯就擒後現委藩司孫長絨等遵

旨於十月二十日將洪幅瑱綁赴市曹凌遲處死二  
十五日將洪芒玕洪芒政黃汝英綁赴市曹凌  
遲處死以快人心惟前獲洪幅瑱時詢以偽璽  
何在據稱玉刻偽璽並未帶出金陵至廣德時

另刻木質偽璽係交親信賊目背負現已不知  
所往旋查該賊目已經營中擒獲提訊供稱九  
月初九夜被俘之時卽已拋棄山谷席寶田隨  
派弁勇押同該犯前往尋覓十月初五日於廣  
石交界民家得該逆木質大小偽璽各一方稟  
送呈驗前來除發善後局存儲外合併陳明奏  
入報

